

## Evening Dogri News Bulletin, 22 March. 2026

इवनिंग डोगरी न्यूज़ बुलेटिन

समे .18:15 Hrs

<><><><><><>

### Headlinesdogri18

1. प्रधानमंत्री नरेंद्र मोदी होर लोकें आसेआ चुनी गेदी सरकार दे सबनें शा लम्मे असें तगर नेतृत्व करने आहले नेता बनी गे न।
2. लेफ्टिनेंट गवर्नर मनोज सिन्हा होरें नगरोटा दे कोल कंडोली मंदर शा प्राचीन मार्ग पवित्रर छडी जातरा गी झंडी दस्सियै रवाना कीता।
3. उपमुख्यमंत्री सुरेंद्र चौधरी होरें अज्ज श्री माता वैश्वो देवी जी दे दरबार च मत्था टेकेआ।
4. केंद्री जल शक्ति मंत्रालय दी तकनीकी सलाहकार कमेटी नै कठुआ जिले च उज्ज आली बहु-उद्देश्यी परियोजना दे नमें सिरेआ तैयार प्रस्ताऽ गी मंजूरी देई दिती ऐ।
5. ते बर्फ हटाने दा कम्म सबूरा होने दे बाद अज्ज दपैह्नी मगरा मुगल रोड गी गड्डियें दी आओजाई लेई खोली दिता गेआ ऐ।

<><><><><><>

### PM-Longest Serving Head

प्रधानमंत्री नरेंद्र मोदी होर लोकें आसेआ चुनी गेदी सरकार दा सबनें शा लम्मे असें तगर नेतृत्व करने आहले नेता बनी गेन। मोदी होरें गुजरात दे मुख्यमंत्री ते भारत दे प्रधानमंत्री दे रूपै च सांझे तौरा पर 8 ज्हार 931 दिनें दा कार्जकाल पूरा करी लैता ऐ। उन्दे शा पैहले पवन कुमार चामलिंग 8 ज्हार 930 दिनें धोडी सिक्किम दे

मुख्यमंत्री रेही चुके दे ना। अपने लम्मे सियासी जीवन च मोदी हुं'दे नाऽ होर बी केई रिकार्ड न जिंदे च सबनें शा लम्मे असें तगर गुजरात दा मुख्यमंत्री बने दा रौहना ते प्रधानमंत्री बनने कोला पैहले सबनें शा लम्मे समें तगर मुख्यमंत्री बने दे रौहने दा रिकार्ड बी शामिल ऐ।

<><><><><><>

### LG-Chari Yatra

लेफ्टिनेंट गवर्नर मनोज सिन्हा होरें अज्ज नगरोटा आले ऐतिहासिक कोल कंडोली मंदरै थमां 24मीं श्री माता वैश्वो देवी जी प्राचीन मार्ग पवित्तर छडी जात्तरा गी झंडी दस्सियै खाना कीता। इस मौके पर एल.जी होरें छडी जात्तरा दे प्रथम पूजन च बी हिस्सा लैता। सिन्हा होरें ऐतिहासिक मंदरै च मत्था टेकेआ ते सबनें लेई रमानदारी, खुशहाली ते कल्याण दी कामना कीती। नगरोटा दिएं विधायक देवयानी राणा बी इस मौके पर उत्थे मजूद हिआं।

<><><><><><>

### Dy. CM-VD Visit

उपमुख्यमंत्री सुरिंद्र चौधरी होरें अज्ज श्री माता वैश्वो देवी जी दे दरबार च मत्था टेकेआ। इस सरबंध्यै च मीडिया कर्मिं कन्नै अपने अनुभव सांझे करदे होई उनें आखेआ ऐ जे उं'दी जात्तरा बडी सुखद ते संदोखै आहली रेई ऐ कीजे उनें अपने परोआर दे कन्नै माता वैश्वो देवी जी दे दरबार च मत्था टेकेआ ऐ। उनें आखेआ जे पिछले बरे दे मुकाबले इस बरे श्री माता वैश्वो देवी श्रद्धालुएं दी गिनतरी च बडा मता बाद्दा दिक्खने गी लब्बा ऐ।

<><><><><><>

### Pilgrims Rush Sukrala

कठुआ जिले दे बिलावर इलाके च स्थित मां शारदा सुकराला देवी जी दे मंदरै च अज्ज श्रद्धालुएं दा बडा भारी रश दिक्खने गी लब्बा। जम्मू ते एह्दे आले-दोआले दे इलाके थमां बी खरी मती गिनतरी च श्रद्धालुएं पूरे जोश ते

भक्ति भावना दे कन्नै मां भगवती दे जयकारे लांदे होई माता सुकराला देवी जी दे दरबार च मत्था टेकेआ। मल्ल माता मंदर दे नांऽ कन्नै लोकप्रिय सुकराला देवी जी दा एहू स्थान जम्मू-कश्मीर च मां शारदा हुं'दे सबनें शा प्राचीन शक्ति पीठें चा इक ऐ।

<><><><><><>

### Ujh-Multipurpose

इक ऐतिहासिक फैसले दे तैहत केंद्री जल शक्ति मंत्रालय दी तकनीकी सलाहकार कमेटी नै कठुआ जिले च उज्ज आली बहु-उद्देश्यी परियोजना दे नमें सिरेआ तैयार प्रस्ताऽ गी मंजूरी देई दित्ती ऐ। एहू परियोजना पाकिस्तान बक्खी जाने आले बादू पानी गी रोकने च मदाद करोग। अपनी हालिया मीटिंग च तकनीकी सलाहकार कमेटी नै उज्ज बहुउद्देश्यी परियोजना दे संशोधित प्रस्ताऽ बारै तफसीली सलाह-सूत्र कीता ते फही इसी मंजूरी बी देई दित्ती। कठुआ थमां लोकसभा सांसद डॉ. जितेंद्र सिंह होरें तकनीकी सलाहकार कमेटी दे इस फैसले दा सुआगत कीता ते आखेआ जे इस परियोजना कन्नै पंजाब ते जम्मू-कश्मीर दे लोकें गी केई तरीकें कन्नै फायदा हासल होग।

<><><><><><>

### Mughal Road Opens

जम्मू दे पुंछ ते राजौरी जिलें गी कश्मीर दे शोपियां कन्नै जोड़ने आहली मुगल रोड तकरीबन 10एं दिनें तगर बंद रौहने दे बाद अज्ज परतियै गड्डियें दी आओजाई लेई खोली दित्ती गेई ऐ। ग्रेफ दे अफसर कमांडिंग अशीष गुप्ता होरें आखेआ जे नागरिक ते कारोबारी गड्डियें गी मुगल रोड पर यात्रा करने दी खुल्ल दित्ती गेदी ऐ। उनें दस्सेआ जे मौसम साफ होने दे बाद शिड़कै थमां बर्फ हटाने दा कम्म रम्भेआ गेआ ऐ जेहड़ा अज्ज दपैह्नी पूरा होआ। तोआई पुंछ दे लोकें मुगल रोड खोलने आस्तै एल.जी प्रशासन ते बी.आर.ओ दा धन्नवाद कीता।

<><><><><><>

### **Prog. Announcement**

आकाशवाणी जम्मू दे क्षेत्रीय समाचार एकांश आसेआ कल यानि 23 मार्च गी “शहीद दिवस-2026” दे मौके पर 25एं मिंटें दा इक विशेष कार्यक्रम प्रसारित कीता जाहग- जेहदा विशे होग “ शहीदें दी कदे मृत्यु नेंई

हुंदी उन्दे आदर्श अमर हुंदे न"। इस विशेश कार्यक्रम दा प्रसारण दपैहरी 12 बजे कीता जाहग ते एहदे च स्हाडे परौहने होडन- केन्द्रीय विश्वविद्याल जम्मू दे Assistant Professor Dr. Ravail Prihar - जेहडे इस चर्चा राएं अपने माहिराना बचार सांझे करडन। इस कार्यक्रम दी मेजबानी स्हाडे न्यूज एंकर विजय बजाज आसेया कीती जाहग।



## Water Day Poonch

विश्व जल दिवस दे मौके पर अज्ज पुंछ च जल शक्ति मैहकमे नै बक्ख-बक्ख कुदरती जल संसाधनें बारै जागरूकता आहली पैहलकदमिएं ते पानी दी जांच सरबंधी बशेष अभियानें दा सरिस्ता कीता जिंदा मकसद साफ पानी दे महत्व गी उजागर करना ते लोकें गी पानी दे संरक्षण ते जिम्मेदाराना इस्तेमाल दी लोड बारै जानकार बनाना हा। इस दरान अधिकारियें ते अमले नै बड़ी सक्रियता कन्नै मकामी समुदाय कन्नै गल्लबात कीती ते पानी दे महत्व बारै जागरूक बनाया।



## Sheep Husbandary

रामबन च भिड्डु पालन मैहकमा, ग्रामीण आजीविका च सुधार करने लेई मुक्ख करी ध्यान माल-मवेशियों दे सैक्टर दे विकास बाहे पर देआ'रदा ऐ। मैहकमे आसेआ बक्ख-बक्ख गतिविधियां जिआं जे मवेशियें दी सेहत दी जांच, टीकाकरण बगैरा दे कन्नो-कन्नी भिड्डु-बकरियें सरबंधी इकाइयां स्थापित करने आस्तै एकीकृत भिड्डु विकास योजना ज्नेही सब्सिडी आधारित योजनाएं गी लागू कीता जा'रदा ऐ। एहदे अलावा करसानें ते नौजवानें गी भिड्डुं दी पैदावार आस्तै आधुनिक ते स्थाई बवस्थाएं ते प्रक्रियाएं बारै सिखलाई देने लेई इक कार्यक्रम बी ऐ।

